



Uunga
Inatsisartunut ilaasortaq
Stine Egede
Inuit Ataqatigiit

Kinguaassiutitigut atorerluisimasut pineqaatissinneqarnermut ilaatillugu katsorsarneqartalernissaat Naalakkersuisut pilersaarutiginaat pillugu § 37 naapertorlugu apeqquummut nr. 130-2020-mut akissut

Asasara Stine Egede

Apeqquutinnut qujanaq. Apeqquut ataani uteqqinneqarpoq akissummillu kinguneqartinneqarluni.

1. Naalakkersuisut pilersaaruteqarnerlutik kinguaassiutitigut atorerluisimasut pineqaatissinneqarnermut ataatillugu katsorsarneqartalernissaannik;

- a. Akissut aappimik akineqarpat, taava qanoq pilersaaruteqarpat?
- b. Akissut naaggamik akineqarpat, taava sooq pilersaaruteqartoqangila?

Eqqartuunneqarsimasup pillarneqareernermi kingorna nutaamik pinerluuteqanginnissaa Kalaallit Nunaanni eqqartuussisarnermik systemimi pingaarutilittut ilaatinneqarpoq. Kinguaassiutitigut atorerluisimasunit, innarliisimasutut eqqartuunneqarsimasunit, inissiisarfik taamaallaat "toqqorsivittut" atorneqassangilaq. Uani isertitsivimmiittut suut eqqortuunerinik suullu ajortuunerinik paasinnilemnessaannut pingaartumik taakkuninga innuttaasunut akuulersitseqqinniarnernut suliniutit annertuumik sunniuteqarput. Taamaammat suliniutit taakku ingerlaavartumik annertusineqartarnissaat nutarterneqartarnissaallu tunaartaralugu Naalakkersuisut suliaqarput. Innarliisartunut eqqartuunneqarsimasunut sammititanik katsorsaanissamat neqerooruteqarnissaq Inatsisinik atuutsitsinnermut suliassaqarfimmi periusissatut suliniutissanullu Naalakkersuisut pilersaarusianni 2017-imeersumi aamma suliniutit ilagaat. Kisianni tamanna naalagaaffeqatigiinni oqartussat suleqatigalugit pissaaq, tassami isertitsivimmiittunut isertitsivimmiinneranni neqeroorutigineqartut Kalaallit Nunaanni Pinerluttunik isumaginnittut suliassaqarfittut akisussaaffigaat.

Inunnut kinguaassiutitigut kannguttaatsuliornermik pissusilersortartunut tapersorsorneqarnissamik- aamma katsorsarneqarnissamik periarfissat tamatuma peqatigisaanik *Killiliisa-mi* – Naalakkersuisut nunamut tamarmut kinguaassiutitigut atorerluineq akiorniarlugu periusissiaanni 2018-2022-imi pitsaaliuinnermik suliniuteqarnerannut ilaavoq. Tamanna naapertorlugu inunnut kinguaassiutitigut pinerluuteqarsimasutut eqqartuunneqarsimasunut, eqqartuussissutigineqarsimasumik naammassinnissimasunut toraagalinnik tapersersuinissamik- aamma katsorsarneqarnissamik neqeroorutit ineriartortinnissaannut, Paarisap, Pitsaaliuinnermut Isumaginninnermullu Aqutisoqarfimmi pitsaaliuinnermut immikkoortap, Kalaallit Nunaanni Pinerluttunik Isumaginnittut suleqatigai.

14-08-2020
Suliap normua 2020 - 13088
Akt. id. 14516337

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iian@nanoq.gl
www.naalakkersuisut.gl

Meeqqat Tasiilami Kalaallit Nunaatalu sinnerani ikiorneqarnissaat pillugu inatsisinik atuutsitsinermut ministerimut aamma isumaginninnermut- aamma nunap iluanut ministerimut ikiorneqarnissaq pillugu 2019-imi julimi Naalakkersuisut sinnerlugit uanga saaffiginnippunga. Tamanna UPA 2019-imi Inatsisartut aalajangiinerat tunuliaqutaralugu pivoq.

Inatsisinit atuutsitsinermut ministeeriaqarfimmut noqqaassummi ilaatigut innarliisartut isertitsivimmiinnermik nalaanni inunnt akuulerseqqinniarlugit katsorsarneqarnissaasa kissaatigineqarnera saqqummiunneqarpoq.

Naalakkersuisut noqqaassuteqarnerat tunuliaqutaralugu meeqqanut inuusuttunullu suliniutit patajaallisarneqarnissaat pillugit kalaallit – qallunaallu oqartussaasoqarfiisa assigiinngitsunik suliallit akornanni suleqatigiinnissaq isumaqatigiissutigineqarpoq tassani sammivik immikkut ittoq ilanngunneqarpoq, tassani inersimasunut innarliisartunut sumiginnaasartunut il.il. pillugit pissutsit pingaarutillit ukkatarineqarlutik. Oqartussaasoqarfiit assigiinngitsunik suliallit akornanni suleqatigiinneq taanna – suliniutit allarpassuit akornanni – isertitsivinni katsorsaanissamik neqeroorutissatut siunnersuutinik aaamma inerneqarumaartoq, taakkulu naalagaaffeqatiginnermi oqartussat suleqatigalugit aallartinneqassasut, Naalakkersuisut neriutigaat.

Inussiarnersumik inuulluaqqusillunga


Martha Abelsen